

湯液本草卷中

海藏

王好古

類集

新安

吳勉學

校梓

草部

防風

純陽

性溫

味甘辛

無毒

足陽明胃經

足太陰脾經乃二經之行經藥

太陽經本經藥

象云治風通用瀉肺實散頭目中滯氣除上集風邪

之仙藥也誤服瀉人上焦元氣去蘆并釵股用
珍云身去身半已上風邪梢去身半已下風邪

心云又去濕之仙藥也風能勝濕爾

本草云主大風頭眩痛惡風風邪目盲無所見風行
周身骨節疼痺煩滿脇痛膈風頭面去來四肢攣
急字乳金瘡內瘻

東垣云防風能制黃芪黃芪得防風其功愈大又云
防風乃卒伍卑賤之職隨所引而至乃風藥中潤
劑也雖與黃芪相制乃相畏而相使者也

本草又云得澤瀉藁本療風得當歸芍藥陽起石

餘糧療婦人子臟風殺附子毒惡乾薑藜蘆白欬
芫花

升麻

氣平

味苦甘

微苦微寒味薄氣厚陽中

之陰也無毒

陽明經本經藥

亦走手陽明經太陰經

象云能解肌肉間熱此手足陽明經傷風之的藥也
去黑皮并腐爛者用若補脾胃非此爲引用不能
補若得葱白白芷之類亦能走手足陽明太陰

心云發散本經風邪元氣不足者用此於陰中升陽氣上行

珍云脾痺非此不能除

本草云主解百毒殺百精老物殃鬼辟瘟疫瘴氣邪氣蠱毒入口皆吐出中惡腹痛時氣毒癘頭痛寒熱風腫諸毒喉痛口瘡

東垣云升麻入足陽明若初病太陽證便服升麻葛根發出陽明經汗或失之過陽明經燥太陽經不可解必傳陽明矣投湯不當非徒無益而又害之也

朱氏云瘀血入裏若衄血吐血者犀角地黄湯乃陽
明經聖藥也如無犀角以升麻代之升麻犀角性
味相遠不同何以代之蓋以升麻止是引地黃及
餘藥同入陽明耳

仲景云太陽病若發汗若利小便重亡津液胃中乾
燥因轉屬陽明其害不可勝言又云太陽兀兀無
汗者葛根湯發之若兀兀自汗者表虛也不宜用
此朱氏用升麻者以表實無汗也

訣云主肺痿欬唾膿血能發浮汗

羌活

氣微溫

味苦甘平

苦辛氣味俱輕陽也無

毒

足太陽經厥陰經藥

太陽經本經藥也

象云治肢節痛利諸節手足太陽經風藥也加川芎
治足太陽少陰頭痛透關節去黑皮并腐爛者用
心云氣溫濕風

珍云骨節痛非此不能除

液云君藥也非無爲之主乃却亂反正之主太陽經
頭痛肢節痛一身盡痛非此不治又云是治足太

陽厥陰少陰藥也與獨活不分二種後人用羌活多用鞭節者用獨活多用鬼眼者羌活則氣雄獨活則氣細故雄者入足太陽細者入足少陰也又錢氏瀉青丸用此任乙同歸一治也或問治頭痛者何荅曰巨陽從頭走足惟厥陰與督脉會於巔逆而上行諸陽不得下故令頭痛也

獨活

氣味與羌活同無毒 氣厚味薄升也苦辛

足少陰腎經行經之藥

本草云上風寒所擊金瘡止痛貢脉癰瘰女子疝瘕

療諸賊風百節痛風無久新者

液云獨活細而低治足少陰伏風而不治太陽故兩足寒濕渾不能動止非此不能治

象云若與細辛同用治少陰經頭痛一名獨搖草得風不搖無風自搖去皮淨用

心云治風須用又能燥濕經云風能勝濕

珍云頭眩目暈非此不能除

柴胡

氣平 味微苦 微寒氣味俱輕陽也升也純陽無毒

少陽經厥陰經行經之藥

象云除虛勞定熱解肌熱去早晨潮熱婦人產前後
必用之藥善除本經頭痛非他藥能止治心下痞
胸膈痛去蘆用

心云少陽經分之藥引胃氣上升苦寒以發表熱
珍云去往來寒熱膽痺非此不能除

本草云主心腹去腸胃中結氣飲食積聚寒熱邪氣
推陳致新除傷寒心下煩熱諸痰熱結實胸中邪
逆五臟間遊氣大腸停積水脹及濕痺拘攣亦可
作浴湯又服輕身明目益精半夏爲之使惡皂莢

畏女苑藜蘆入足少陽主東方分也在經主氣在
臟主血證前行則惡熱却退則惡寒雖氣之微寒
味之薄者故能行經若佐以三稜廣茂巴豆之類
故能消堅積是主血也婦人經水適來適斷傷寒
雜病易老俱用小柴胡湯主之加以四物之類并
秦艽牡丹皮輩同爲調經之劑

衍義云柴胡本經並無一字治勞今人治勞方中鮮
有不用者凡此誤世甚多嘗原病勞有一種真臟
虛損復受邪熱因虛而致勞故曰勞者牢也須當
斟酌用之如經驗方治勞熱青蒿煎丸用柴胡正

合宜耳服之無不效

山華子云味其補五勞七傷除煩止驚益氣力藥性
論亦謂治勞乏羸瘦若此等病苟無實熱醫者取
而用之不亡何待註釋本草一字亦不可忽蓋後
世所誤無窮也苟有明哲之士自可處制中下之
士不肯考究枉致淪沒可不謹哉可不戒哉如張
仲景治寒熱往來如虐用柴胡正合其宜

圖經云治傷寒有大小柴胡湯柴胡加龍骨牡蠣柴
胡加芒硝等湯故後人治傷寒熱此爲最要之藥
東垣云能引清氣而行陽道傷寒外諸藥所加有熱

則加之無熱則不加又能引胃氣上行升騰而行
春令是也欲其如此又何加之

海藏云能去臟腑內外俱乏既能引清氣上行而順
陽道蓋以少陽之氣初出地之皮爲嫩陽故以少
陽當之

葛根

氣平 味甘 無毒

陽明經引經藥

足陽明經行經的藥

象云治脾虛而渴除胃熱解酒毒通行足陽明經之

藥去皮用

心云止渴升陽

珍云益陽生津勿多用恐傷胃氣虛渴者非此不能除

本草云主消渴身大熱嘔吐諸痺起陰氣解諸毒療傷寒中風頭痛解肌發表出汗開腠理療金瘡止痛脇風痛生根汗寒治消渴傷寒壯熱花主消酒粉味其大寒主壓丹石去煩熱利大小便止渴小兒熱瘥以葛根浸搗汁飲之良

東垣云葛根其平溫世人初病太陽證便服葛根升

麻湯非也

朱奉議云頭痛如欲破者連鬚葱白湯飲之又不已者葛根葱白湯

易老云用此以斷太陽入陽明之絡卽非太陽藥也故仲景治太陽陽明合病桂枝湯內加麻黃葛根也又有葛根黃芩黃連解肌湯是知葛根非太陽藥卽陽明藥

食療云葛根蒸食之消毒其粉亦甚妙其粉以水調三合能解鴆毒

衍義云治中熱酒渴病多食行小便亦能使人利病

酒及渴者得之甚良

易老又云太陽初病未入陽明頭痛者不可便服葛根發之若服之是引賊破家也若頭顱痛者可服之葛根湯陽明自中風之仙藥也

本草又云殺野葛巴豆百藥毒

葳靈仙

氣溫 味苦甘 純陽

象云主諸風濕冷通五臟去腹內痰滯腰膝冷痛及治傷損鐵腳者佳去蘆用

心云去大腸之風

湯液本草
本草云忌茗

細辛

氣溫 味大辛 純陽 性溫氣厚於味陽也

無毒

少陰經藥

手少陰引經之藥

象云治少陰頭痛如神當少用之獨活爲使爲主用
去蘆頭并葉華州者佳

珍云主少陰經頭痛

心云止諸項頭痛諸風通用之味辛熱溫陰經散水

寒以去內寒

本草云主欬逆頭痛腦動百節拘攣風濕痺痛死肌
溫中下氣破痰利水道開胸中除喉痺齕鼻風癰
癰疾下乳結汗不出血不行安五臟益肝膽通精
氣久服明目利九竅

東垣云治邪在裏之表故仲景少陰證用麻黃附子
細辛湯也

易老云治少陰頭痛太陽則羌活少陰則細辛陽明
則白芷厥陰則川芎吳茱萸少陽則柴胡用者隨
經不可差細辛香味俱細而緩故入少陰與獨活